

**“Kambag‘al oilalar reyestri”ga kiritilgan oilalarning
farzandlarini qabul qilgan oilaviy nodavlat maktabgacha ta‘lim
tashkilotlariga ushbu bolalar ta‘minoti uchun ota-onalar
to‘lovining bir qismini Davlat budjetidan qoplab berish tartibi
to‘g‘risidagi
NIZOM**

Ushbu Nizom oilaviy nodavlat maktabgacha ta‘lim tashkilotlarida (bundan buyon matnda oilaviy MTT deb yuritiladi) tarbiyalanayotgan “Kambag‘al oilalar reyestri”ga kiritilgan oilalarning (bundan buyon matnda ayrim toifadagi oilalar deb yuritiladi) farzandlari uchun ota-onalar to‘lovining bir qismini Davlat budjetidan qoplab berish tartibini belgilaydi.

1-bob. Ayrim toifadagi oilalarning farzandlari uchun kompensatsiya belgilash

1. Ayrim toifadagi oilalarning farzandlari to‘g‘risidagi ma‘lumotlar “Bolalar bog‘chasi” maktabgacha ta‘limni boshqarish axborot tizimida “Raqamli hukumat” tizimining idoralararo integratsiyalashuv platformasi orqali shakllantiriladi hamda “Nodavlat maktabgacha ta‘lim tashkilotlarini boshqarish” axborot tizimiga (bundan buyon matnda axborot tizimi deb yuritiladi) uzatiladi.

2. Ota-onalar to‘lovining bir qismi (bundan buyon matnda kompensatsiya deb yuritiladi) Davlat budjetidan qoplab beriladigan ayrim toifadagi oilalarning farzandlari ro‘yxati (bundan buyon matnda ro‘yxat deb yuritiladi) axborot tizimi orqali avtomatik ravishda shakllantiriladi.

Oilaviy MTTga qabul qilingan ayrim toifadagi oilalar farzandlarining soni mazkur Nizomning 6-bandi ikkinchi xatboshisida belgilangan miqdordan ko‘p bo‘lganda, ro‘yxat ayrim toifadagi oilalarning quyidagi ustuvor ketma-ketligi asosida aniqlanadi:

“qizil” toifa;

“sariq” toifa;

“yashil” toifa (kambag'al oilalar reyestriga kiritilish ehtimoli yuqori bo'lganligi asosi bilan “yashil” toifaga kiritilgan oilalar bundan mustasno).

Oilaviy MTTga qabul qilingan bir xil toifadagi oilalarning farzandlari soni mazkur Nizomning 6-bandi ikkinchi xatboshisida belgilangan miqdordan ko'p bo'lganda, ro'yxatga kiritish ularning oilaviy MTTga qabul qilingan sanasiga muvofiq ketma-ketlikda amalga oshiriladi.

3. Ayrim toifadagi oilalarning farzandlari boshqa maktabgacha ta'lim tashkilotiga o'tkazilganligi, mazkur Nizomning 8-bandida nazarda tutilgan imtiyozlardan to'liq foydalanib bo'lganligi sababli ro'yxatdan chiqarilganidan so'ng, ularning o'rniga mazkur Nizomning 2-bandida nazarda tutilgan ketma-ketlik asosida boshqa ayrim toifadagi oilalarning farzandlari uchun kompensatsiya belgilanadi.

Ayrim toifadagi oilalarning farzandlari boshqa oilaviy MTTga o'tkazilganda, ular mazkur oilaviy MTTdagi kompensatsiya belgilanishi mumkin bo'lgan bo'sh o'rinlarga mazkur Nizomning 2-bandida belgilangan tartibda joylashtirilgan sanadan kompensatsiya to'lash davom ettiriladi.

4. Kompensatsiya belgilangan ayrim toifadagi oilalar farzandlari to'g'risidagi ma'lumotlar axborot tizimida ularning ota-onalari shaxsiy kabinetida aks etadi.

5. Ayrim toifadagi oilalar farzandlari uchun kompensatsiya belgilanganligi yoki to'xtatilganligi haqida ularning ota-onalari mobil ilova hamda telefon raqamiga SMS xabarnoma yuborish orqali xabardor qilinadi.

Xabarnomada bolaning ismi, familiyasi va otasining ismi, kompensatsiya belgilangan yoki to'xtatilgan sana hamda kompensatsiya miqdori ko'rsatiladi.

2-bob. To'lovlarni amalga oshirish

6. Ayrim toifadagi oilalarning ota-onalar to'lovini qoplash uchun oilaviy MTTga kompensatsiya tegishli hududda 9 soatlik ish rejimidagi umumiy tipdagi davlat maktabgacha ta'lim tashkilotlari uchun belgilangan ota-onalar to'lovining 40 foizi miqdorida ajratiladi.

Kompensatsiya oilaviy MTTga haqiqatda qatnayotgan ayrim toifadagi oilalar farzandlari sonidan kelib chiqib, biroq O'zbekiston Respublikasi Maktabgacha va maktab ta'limi vazirligi bilan oilaviy MTT o'rtasida tuzilgan bitimda belgilangan o'rinlarning 15 foizidan ko'p bo'lmagan qismiga ajratiladi. Bunda, o'rinlar soni qoldiqqa ega bo'lgan taqdirda, qoldig'i 0,5 dan kichik bo'lgan sonlar 0 ga, 0,5 va undan yuqori bo'lgan sonlar esa 1 ga yaxlitlanadi.

Kompensatsiya oilaviy MTTning hisobvarag'iga ularga ajratiladigan boshqa subsidiyalar bilan birga to'lab boriladi.

7. Kompensatsiyaning oylik to'lovi summasi O'zbekiston Respublikasi Vazirlar Mahkamasining 2022-yil 2-avgustdagi 426-son "Maktabgacha ta'lim sohasida davlat-xususiy sheriklik munosabatlarini zamonaviy raqamli texnologiyalar yordamida soddalashtirish chora-tadbirlari to'g'risida"gi qaroriga asosan tarbiyalanuvchining haqiqiy davomatidan kelib chiqqan holda axborot tizimida hisoblanadi.

8. Ayrim toifadagi oila "Kambag'al oilalar reyestri" axborot modulida "qizil" yoki "sariq" toifadan "yashil" toifaga o'tkazilganda, kompensatsiya keyingi o'n ikki oy mobaynida to'lab boriladi.

9. O'zbekiston Respublikasi Maktabgacha va maktab ta'limi vazirligi bilan oilaviy MTT o'rtasida tuzilgan bitimga o'zgartirishlar kiritilishi natijasida o'rinlar soni kamaygan taqdirda, kompensatsiya to'lanishi belgilangan ayrim toifadagi oilalar uchun kompensatsiya to'lash bo'yicha imtiyozlar saqlab qolinadi. Bunda, mazkur Nizomning 8-bandi talablari hisobga olinadi.

10. O'zbekiston Respublikasi Maktabgacha va maktab ta'limi vazirligi tomonidan oilaviy MTTga o'tgan davr uchun to'lanmagan yoki ortiqcha to'langan kompensatsiya keyingi oy uchun kompensatsiyalar tegishli summaları qo'shilgan yoki kamaytirilgan holda qayta hisob-kitob qilinadi.

Bunda, mazkur Nizomning 8-bandida nazarda tutilgan muddat tugagan hollarda, ortiqcha to'langan kompensatsiya oilaviy MTTga ajratiladigan boshqa subsidiyalar hisobidan chegirib qolinadi.

O'zbekiston Respublikasi Maktabgacha va maktab ta'limi vazirligi bilan oilaviy MTT o'rtasida tuzilgan bitim muddati tugaganda yoki bekor qilinganda ortiqcha to'langan kompensatsiya oilaviy MTT tomonidan Davlat budjetiga qaytariladi.

3-bob. Yakuniy qoidalar

11. Ayrim toifadagi oilalar farzandlarining oilaviy MTTga jalb etilishiga to'sqinlik qilishga yoki boshqa ko'rinishda kamsitishga yo'l qo'yilmaydi.

12. Ushbu Nizom talablarining buzilishida aybdor bo'lgan shaxslar qonunchilik hujjatlarida belgilangan tartibda javobgar bo'ladilar.